



RESOLUCIÓN DO 20 DE DECEMBRO DE 2018 POLA QUE SE FORMULA O DOCUMENTO DE ALCANCE PARA A AVALIACIÓN AMBIENTAL ESTRATÉXICA ORDINARIA DA MODIFICACIÓN PUNTUAL NÚMERO 2 DAS NORMAS SUBSIDIARIAS DE PLANEAMENTO DO CONCELLO DE CERDEDO-COTOBADE

Promotor: Concello de Ceredo-Cotobade

Órgano substantivo: Dirección Xeral de Ordenación do Territorio e Urbanismo (DXOTU)

Expediente: 2018AAE2257

Código web: 2134/2018

Con base na proposta de resolución do Servizo de Avaliación Ambiental de Plans e Programas, da Subdirección Xeral de Avaliación Ambiental, que a continuación se transcribe

ANTECEDENTES

- 1 O ámbito territorial correspondente co antigo concello de Cotobade, hoxe integrado no concello de Ceredo-Cotobade, réxese polas Normas subsidiarias aprobadas o 25.02.1997.
- 2 O día 24.08.2018 a Dirección Xeral de Calidade Ambiental e Cambio Climático recibiu un escrito do Concello de Ceredo-Cotobade no que solicita iniciar o procedemento de avaliación ambiental estratéxica simplificada da *Modificación puntual número 2 das Normas subsidiarias de planeamento do concello de Ceredo-Cotobade*, para o que achega o documento ambiental estratéxico e o borrador da proposta.
- 3 O día 29.08.2018 acórdase someter o documento ambiental estratéxico e o borrador da Modificación a un período de consulta pública durante un prazo de dous meses na sede electrónica deste órgano ambiental. Ao mesmo tempo consultouse á Dirección Xeral de Ordenación do Territorio e Urbanismo e a outras administracións públicas afectadas.
- 4 O día 20/12/2018 esta Dirección Xeral emitiu o informe ambiental estratéxico, resolvendo a necesidade de someter dita Modificación puntual a avaliación ambiental estratéxica ordinaria.

CONSIDERACIÓNS LEGAIS

- 1 A Lei 2/2016, do 10 de febreiro, do solo de Galicia (LSG), integra no procedemento de aprobación dos instrumentos de planeamento urbanístico o proceso de avaliación ambiental estratéxica previsto na Lei 21/2013, do 9 de decembro, de avaliación ambiental. A través do Decreto 143/2016, do 22 de setembro, aprobouse o regulamento da dita Lei do solo.
- 2 O artigo 46.1.d) da Lei 2/2016 sinala que deben someterse ao procedemento de avaliación ambiental estratéxica ordinaria os plans obxecto de avaliación ambiental estratéxica simplificada cando así o decida o órgano ambiental no informe ambiental estratéxico.
- 3 O artigo 31.2 a) da Lei 21/2013, establece que o órgano ambiental -unha vez resolta a emisión do informe ambiental estratéxico- notificará esta decisión ao promotor xunto co documento de alcance do estudo ambiental estratéxico e o resultado das consultas realizadas, para que continúe coa tramitación do procedemento de avaliación ambiental ambiental ordinaria.
- 4 O Decreto 167/2015, do 13 de novembro, polo que se establece a estrutura orgánica da Consellería de Medio Ambiente e Ordenación do Territorio, atribúe á Secretaría Xeral de Calidade e Avaliación Ambiental as funcións en materia de avaliación dos efectos de determinados plans e programas no ambiente. A través do Decreto 177/2016, do 15 de decembro, polo que se fixa a estrutura orgánica da Vicepresidencia e das consellerías da Xunta de Galicia, dita secretaría pasa a denominarse Dirección Xeral de Calidade Ambiental e Cambio Climático.

CONSIDERACIONES TÉCNICAS

1. Obxectivos do planeamento, alternativas e proposta inicial

O obxecto da Modificación puntual é habilitar un solo urbanizable para o desenvolvemento dun polígono industrial, incorporando a ordenación pormenorizada do ámbito.

Barállanse tres **alternativas** de localización do ámbito, ademais da alternativa "0" (de non levar a cabo a Modificación): a alternativa "1", que propón a execución do desenvolvemento na parroquia de Santa María de Sacos, en Ponte Mocín; a alternativa "2", que sitúa o ámbito industrial na zona central do concello -lindando co solo urbano- e a alternativa "3", que prevé a súa localización entre os núcleos de Calvelo e Tenorio. Resulta elixida a alternativa "1", xustificando que resulta a de menor incidencia ambiental.

A **proposta** prevé a localización dun sector de solo urbanizable de uso industrial (S-01), de 117.984 m², nunha posición central do municipio -en terreos do anterior concello de Cotobade- e a carón da estrada nacional N-541.

A ordenación do ámbito prevé unha serie de vías internas que conectan coa estrada N-541 a través dunha glorieta. As zonas verdes dispóñense ao redor das áreas de uso industrial, para favorecer a transición coa contorna rural. Así mesmo, de forma paralela ao viarios, discorren un carril-bici e unha senda peonil. A reserva para equipamentos localízase en dúas parcelas no límite leste do sector, e as infraestruturas de saneamento nunha parcela exterior adscrita ao ámbito.

Para o abastecemento de auga será necesaria unha captación dende o río Lérez e, no caso do saneamento, prevese a execución dunha EDAR e unha balsa de decantación de pluviais, que se localizarán na mesma parcela. En canto á enerxía eléctrica, existe conexión directa cunha rede de alta tensión que provén dunha das minicentrais hidráulicas do río Lérez.





2. Ámbito de actuación e principais características ambientais

O ámbito sitúase no concello de Ceredo-Cotobade, ao oeste da provincia de Pontevedra. O municipio conta con 6.107 habitantes (INE, 2017) que se distribúen en 186 entidades de poboación, pertencentes a 21 parroquias. O sector de maior ocupación é os servizos (69,5%), seguido da industria (13%), a construción (12,3%) e a agricultura (5,2%).

Os terreos obxecto da Modificación aparecen clasificados nas Normas subsidiarias de planeamento vixentes¹ como solo rústico de protección ordinaria (88%), solo rústico de protección de augas (11%) e solo rústico de protección de infraestruturas (1%). Actualmente comprenden vexetación arbórea e prados con presenza de pequenas parcelas de cultivos na contorna.

O sector aséntase ao sur da estrada N-541, nunha zona con pendentes suaves e moderadas que se incrementan no descenso cara o regueiro dos Frois, cuxa zona de pola coincide co límite oeste do ámbito.

O termo municipal intégrase na grande área paisaxística Rías Baixas e dentro da comarca paisaxística Baixo Lérez, e o extremo oeste do ámbito é lindeiro coa Área de especial interese paisaxístico San Xusto- Río Lérez. Aínda que a metade leste de Ceredo-Cotobade forma parte da Rede Natura 2000 (ZEC Serra do Cando), a Modificación queda fóra da súa delimitación e non afecta a espazos naturais protexidos nin a outros enclaves que contén con algún réxime de protección por aplicación da lexislación da natureza, dos espazos naturais ou da flora e da fauna .

Os terreos municipais contemplan un ámbito de máis dun millón de metros cadrados que foi recollido no Plan sectorial de ordenación das áreas empresarias de Galicia (PSOAE). Este sector, previsto para acoller instalacións industriais de carácter supramunicipal, deberá ser desenvolvido pola administración autonómica ou estatal.

En relación ás infraestruturas, a principal vía de comunicación de Ceredo-Cotobade é a estrada nacional N-541, que atravesa o territorio municipal e o comunica coa cidade de Pontevedra. Convén indicar que a metade occidental do concello está afectada pola servidume aeronáutica do aeroporto de Peinador-Vigo.

3. Consultas realizadas

Recibiuse resposta da Dirección Xeral de Ordenación do Territorio e Urbanismo, do Instituto de Estudos do Territorio, da Dirección Xeral do Patrimonio Cultural, da Dirección Xeral de Ordenación Forestal, da Dirección Xeral de Mobilidade e da Dirección Xeral de Pesca, Acuicultura e Innovación Tecnolóxica. No Informe ambiental estratéxico resúmense as principais observacións e súxestións formuladas con incidencia ambiental. No entanto, as cuestións doutra índole deberán considerarse tamén na elaboración e tramitación da Modificación puntual, para o que se achegan os textos íntegros.

Os informes recibidos fan alusión -principalmente- á xustificación da reserva de solo industrial, á afección paisaxística da proposta e á protección dos xacementos arqueolóxicos situados na contorna do sector.

4. Consideracións para a mellor integración dos aspectos ambientais na Modificación

De acordo co proceso de avaliación ambiental estratéxica, a formulación da proposta deberá garantir unha axeitada integración dos aspectos ambientais de cara a contribuír “ao desenvolvemento económico equilibrado e sustentable do territorio, á cohesión social e á mellora da calidade de vida da poboación e á utilización racional do territorio e á sustentabilidade ambiental”, en coherencia co modelo territorial que establecen as Directrices de ordenación do territorio (DOT).

¹ por aplicación da disposición transitoria 1º.2 da LSG

Neste documento de alcance incorpóranse parte das observacións e suxestións con incidencia ambiental recibidas durante o período de consultas previas. Porén, o Concello deberá considerar no proceso de elaboración e tramitación da Modificación puntual todas as observacións formuladas, para o cal remítenselle os textos íntegros recibidos.

Neste sentido, tendo en conta a documentación achegada (borrador da Modificación e documento ambiental estratéxico) e as suxestións recibidas durante a fase de consultas previas, fanse as seguintes consideracións, organizadas por variables ambientais, na procura dunha mellor integración ambiental da proposta:

Ocupación do territorio

A execución do parque empresarial suporá a ocupación permanente e a transformación de solos que contan con vocación agroforestal e que forman parte da contorna rural característica do concello, actualmente en estado de semiabandono. A ocupación das edificacións será aproximadamente o 60% da superficie bruta do sector, incluíndo os usos industriais, os usos terciarios e os equipamentos.

O concello de Ceredo-Cotobade conta, a día de hoxe, co parque empresarial de Ceredo -de máis de un millón de metros cadrados- recollido no Plan sectorial de áreas empresariais de Galicia (PSOAEG) e aínda non desenvolto. Polo tanto, cómpre xustificar axeitadamente a delimitación do novo sector urbanizable S-01 en base a un estudo da demanda local de solo industrial no concello.

Paisaxe

Á beira oposta da estrada N-541, llindeira co sector, está delimitada a Área de especial interese paisaxístico (AEIP) de San Xusto-Río Lérez, polo que a proposta deberá prestar especial atención á transición con este espazo, incluíndo actuacións de apantallamento vexetal nas zonas de contacto coa área industrial.

Por outra banda, a implantación dun polígono industrial sobre terreos de natureza agraria implica unha notable transformación paisaxística, ao producirse un cambio no tipo de uso e cobertura do solo. Ao respecto, ademais das medidas recollidas na documentación, deberase elaborar un **estudo de impacto e integración paisaxística** e incorporar medidas adicionais para mitigar os efectos da implantación do parque empresarial na contorna rural do concello, minimizando os movementos de terras e mellorando a integración visual do desenvolvemento.

Patrimonio cultural

O ámbito da Modificación vese afectado polo contorno de protección dos petroglifos Laxe das Rodas e Lombo da Costa, localizados ao oeste da estrada N-541, polo que debe realizarse unha prospección arqueolóxica do ámbito, especialmente naquelas zonas que non contan cunha prospección realizada cunha antigüidade menos de 5 anos, prestando atención á posible existencia de elementos do patrimonio etnolóxico vinculados aos cursos fluviais.

Debido a que o contorno grafado no Plan básico autonómico é xenérico, deberá delimitarse un contorno de protección de xeito preciso. No caso de que a proposta afecte ao contorno de protección dos bens arqueolóxicos, debe elaborarse un Catálogo propio da Modificación, cumprindo co artigo 35 da Lei de Patrimonio cultural de Galicia (LPCG).

Ademais, deberase atender ao establecido no artigo 46 da LPCG, que indica que "se procurará evitar os movementos de terras que supoñan unha variación significativa da topografía orixinal do ámbito".

Recoméndase empregar a estratexia de destinar espazos arborados de transición para integrar paisaxisticamente a área industrial proposta, de xeito que se minimice o impacto visual cara os xacementos arqueolóxicos.



Patrimonio natural

A disposición das áreas edificables requirirá importantes movementos de terras. Tendo en conta a problemática derivada do risco de propagación de especies vexetais invasoras no medio, a proposta deberá incluir medidas dirixidas á prevención, resposta temperá e control destas especies, para evitar o seu establecemento e propagación no territorio. Prestarase especial atención aos movementos de terras, aplicando procedementos e métodos de traballo que eviten a dispersión destas especies. En concreto comprobarase previamente en cada caso a ausencia de especies exóticas invasoras nos terreos a remover e avaliarase o risco de propagación.

Asemade, deberán adoptarse medidas para evitar que os movementos de terra, xunto cos propios vertidos que se xeren pola actividade industrial podan afectar ao sistema fluvial e á Zona de especial conservación da Rede Natura 2000 Río Lérez. No primeiro caso é previsible unha afección á fauna bentónica polo depósito de sólidos en suspensión, mentres que no segundo caso o vertido final da EDAR suporá un incremento do contido de nutrientes das augas que favorecen o proceso de eutrofización.

No tocante ás zonas verdes, deberán adoptarse as medidas necesarias para manter as características naturais, utilizando preferentemente especies autóctonas e limitando expresamente o emprego de especies exóticas ou con carácter invasor.

Riscos

Todo o concello está clasificado como zona de alto risco de incendio segundo a Orde do 18 de abril do 2007 pola que se zonifica o territorio con base no risco espacial de incendio forestal. Porén segundo a información dispoñible o ámbito non sufriu incendios forestais nos últimos anos. Atenderase ás determinacións respecto á lexislación relativa aos incendios forestais (Lei 3/2007, do 9 de abril, de prevención e defensa contra incendios forestais de Galicia, modificada pola Lei 9/2017 de medidas fiscais e administrativas).

Finalmente, o sector está afectado polas servidumes aeronáuticas do aeroporto de Vigo, polo que a Modificación deberá incorporar as limitacións que estas imponen (det. 4.3.3 DOT).

Ciclo hídrico

- Rede fluvial e zonas de protección

Nas proximidades do ámbito discorre o regueiro dos Frois, cuxa zona de pola coincide co límite oeste do sector. Aínda que a meirande parte da súa superficie se integra na proposta como zona verde, unha pequena parte coincide coa zona industrial e coas infraestruturas de saneamento, que deberán respectar o establecido na lexislación sectorial vixente.

- Dispoñibilidade de recursos hídricos e saneamento

A implantación do parque empresarial suporá un incremento nas necesidades do recurso auga para abastecemento, así como no caudal de vertido derivado do saneamento, sendo necesarias novas redes e infraestruturas. Para o abastecemento ao ámbito prevese unha captación dende o río Lérez, e no caso do saneamento, prevese a execución dunha EDAR e unha balsa de decantación de pluviais localizadas na mesma parcela.

O desenvolvemento está condicionado a que quede garantido o abastecemento de auga, o saneamento das augas residuais e a xestión das augas pluviais (art. 44.i.3 do Plan hidrolóxico de Galicia Costa). Lémbrase que o informe da Administración hidrolóxica sobre a existencia de recursos hídricos necesarios para satisfacer as novas demandas será determinante para o contido da declaración ambiental estratéxica (artigo 22.3 do Real Decreto Lexislativo 7/2015).

Mobilidade

O novo parque empresarial terá efectos sobre a mobilidade, ao incrementar o fluxo de vehículos na contorna do parque empresarial. Se ben o estudo de mobilidade que se inclúe coa Modificación realiza unha estimación do número de vehículos diario na N-541 na fase de funcionamento do parque empresarial (aproximadamente 34 camións e 506 automóbiles, distribuídos ao longo do día), afirmando que non terá repercusión negativa sobre a estrada, deberá valorarse tamén a repercusión do incremento de tráfico rodado sobre a rede secundaria.

Valórase positivamente a proposta dunha rede de itinerarios peónis, así como a creación dun carril bici de forma paralela aos viarios do sector, medidas que poden contribuír á redución do fluxo de vehículos na contorna.

Atmosfera e cambio climático

Tendo en conta que a Lei 21/2013 esixe considerar o cambio climático na avaliación ambiental, deberá analizarse a pegada de carbono asociada ao desenvolvemento da Modificación puntual e estableceranse as medidas adecuadas para mitigar a súa incidencia sobre o cambio climático, considerando a información disponible².

A Modificación recolle os obxectivos de calidade acústica establecidos para as novas áreas industriais. Ademais, deberase incorporar a zonificación acústica do ámbito tendo en conta a eventual existencia de zonas de servidume acústica, adoptando as medidas necesarias para lograr a compatibilidade entre as distintas áreas acústicas.

Enerxía

Deberase promover o aforro enerxético e o emprego de enerxías renovables, adoptando solucións técnicas que levan consigo un maior aforro de enerxía e criterios de arquitectura sustentable, limitando tamén a contaminación lumínica nas instalacións de alumeadoo exterior.

As compañías subministradoras e distribuidoras establecerán unha estimación das necesidades e do custo das infraestruturas asociadas ao novo desenvolvemento industrial e emitirán informe sobre a suficiencia das infraestruturas e dos servizos existentes e previstos antes de iniciar a tramitación do plan parcial.

Ciclo de materiais

A execución do parque empresarial suporá un incremento no consumo de materiais e na produción de residuos, polo que deberán incorporarse as determinacións necesarias tendentes á redución do consumo de materiais e de produción de residuos. Entre outras, empregar materiais locais tradicionais na construción, reducir os movementos de terras, reducir o consumo de materiais na edificación e fomentar o emprego de materiais reciclados ou reciclables.

5. Contido, amplitude e nivel de detalle do estudo ambiental estratéxico

O estudo ambiental estratéxico (EsAE) é, en esencia, o resultado dos traballos de identificación, descripción e avaliación dos posibles efectos significativos no medio como resultado da aplicación do plan, e debe considerar alternativas razonables aos mesmos que sexan técnica e ambientalmente viables. Dito documento deberá conter a data da súa conclusión e vir asinado polo seu/s autor/es, especificando a súa titulación, tal e como esixe o artigo 16 da Lei 21/2013.

Atendendo ao contido mínimo que establece o anexo IV da Lei 21/2013, sen prexuízo de que o promotor incorpore cuestións que considere relevantes, o EsAE deberá conter:

- Un esbozo do contido, obxectivos principais do planeamento e relacións con outros plans e

² Recoméndase a consulta da Guía de medidas para a mitigación e adaptación ao CC no planeamento urbanístico editada pola FEMP, Rede española de ciudades polo clima (http://www.gea21.com/_media/publicaciones/guia_femp_medidas_ccc_planeamiento_urbaro.pdf)



programas pertinentes (polo menos coas Directrices de ordenación do territorio);

- Os aspectos relevantes da situación actual do ambiente e a súa probable evolución en caso de non se aplicar o planeamento;
- As características ambientais das zonas que poidan verse afectadas de maneira significativa e a súa evolución tendo en conta o cambio climático esperado no prazo de vixencia do planeamento;
- Calquera problema ambiental existente que sexa relevante para a Modificación puntual.
- Os obxectivos de protección ambiental fixados nos ámbitos internacional, comunitario ou nacional que garden relación co plan ou programa e a maneira en que tales obxectivos e calquera aspecto ambiental se tiveron en conta durante a súa elaboración;
- Os probables efectos significativos no ambiente, incluídos aspectos como a ocupación do territorio, a paisaxe, a mobilidade, o patrimonio natural, o patrimonio cultural, o ciclo hídrico, a enerxía, o ciclo de materiais, os riscos naturais e antrópicos, a súa incidencia no cambio climático –en particular, unha avaliación da pegada de carbono da proposta–, e a interrelación entre estes factores. Estes efectos deben comprender os efectos secundarios, acumulativos, sinérxicos, a curto, medio e longo prazo, permanentes e temporais, positivos e negativos;
- As medidas previstas para previr, reducir e, na medida do posible, compensar calquera efecto negativo importante no ambiente da aplicación do plan ou programa, incluíndo aquelas para mitigar a súa incidencia sobre o cambio climático e permitir a súa adaptación a el;
- Un resumo dos motivos da selección das alternativas consideradas e unha descripción da maneira en que se realizou a avaliación, incluídas as dificultades que se poidan ter encontrado para reunir a información requirida;
- Un programa de vixilancia ambiental no que se describan as medidas previstas para o seguimiento;
- Un resumo de carácter non técnico da información facilitada en virtude das epígrafes precedentes;
- Cartografía. O EsAE deberá incluir todos os planos necesarios para a correcta identificación das alternativas e proposta formuladas así como para a caracterización ambiental do ámbito de actuación e da súa área de influencia: condicións do relevo, patrimonio cultural, espazos de especial interese natural, usos do solo, riscos naturais³, cursos fluviais, infraestruturas de abastecemento e de saneamento, entre outros (non será necesario incluir no EsAE planos temáticos, que deben formar parte da propia documentación da Modificación puntual segundo o establecido na legislación urbanística). A documentación cartográfica que se elabore axustarse ás especificacións técnicas que figuran no apartado “Información cartográfica” da páxina web de avaliación ambiental estratégica de plans e programas da Consellería de Medio Ambiente, Territorio e Vivenda⁴.

6. Proceso de información pública e consultas

6.1. Modalidade de información pública e consultas

Con carácter previo á aprobación inicial da Modificación puntual, o Concello de Ceredo-Cotobade consultarán ás seguintes Administracións:

Administración xeral do Estado - Ministerio de Fomento

³ Artigo 22.2 do Real Decreto Lexistativo 7/2015

⁴ https://cmatv.xunta.gal/tema/c/CMAOT_Avaliacion_ambiental

- Dirección Xeral de Estradas
- Dirección Xeral de Aviación Civil

Conforme co disposto nos artigos 83.5 e 60.6 da LSG, logo do informe dos servizos técnicos e xurídicos municipais sobre a conformidade da Modificación puntual coa lexislación vixente, o Concello procederá á súa aprobación inicial e someterá o documento a información pública durante un prazo de dous meses, mediante anuncio que se publicará no *Diario Oficial de Galicia* e nun dos xornais de maior difusión na provincia.

Simultaneamente ao trámite de información pública, o Concello ou o órgano competente en materia de urbanismo, segundo corresponda, deberá **consultar ás Administracións públicas afectadas e ás persoas interesadas**. En canto ás consultas a efectuar, sen prexuízo dos informes sectoriais que resulten preceptivos de acordo coa lexislación sectorial aplicable, en relación á avaliación ambiental da Modificación puntual, consultaránse ás seguintes administracións e organismos:

Administracións e organismos públicos

1. Administración da Comunidade Autónoma de Galicia:

- Consellería de Medio Ambiente, Territorio e Vivenda
 - Dirección Xeral de Calidade Ambiental e Cambio Climático
 - Dirección Xeral de Patrimonio Natural
 - Instituto de Estudos do Territorio
 - Dirección Xeral de Mobilidade
- Consellería de Cultura e Turismo
 - Dirección Xeral do Patrimonio Cultural
- Consellería do Medio Rural
 - Dirección Xeral de Planificación e Ordenación Forestal
 - Dirección Xeral de Defensa do Monte
 - Dirección Xeral de Desenvolvemento Rural
- Consellería de Infraestruturas e Mobilidade
 - Augas de Galicia
 - Axencia Galega de Infraestruturas
- Consellería de Economía, Emprego e Industria
 - Dirección Xeral de Enerxía e Minas

3. Administración local:

- Deputación provincial de Pontevedra

Público interesado:

- Asociación para a Defensa Ecolólica de Galiza (ADEGA)
- Sociedade Galega de Historia Natural

6.2. Integración dos resultados

Tomando en consideración os resultados do trámite de información pública e consultas, o Concello modificará, de ser preciso, o estudo ambiental estratéxico e elaborará a proposta final da Modificación puntual. Feito isto, o Concello remitirá ao órgano ambiental o expediente de avaliación ambiental estratéxica completo -en formato dixital- para que formule a declaración ambiental estratéxica (artigo 60.9 da LSG), o cal deberá conter (144.9 do Regulamento da LSG):



- **Proposta final da Modificación puntual e o estudo ambiental estratéxico.**
- **Informe de participación pública e consultas** no que se describa o procedemento seguido, a relación de Administracións públicas consultadas e persoas interesadas, as datas de solicitude e resposta, así como dos medios empregados para a súa difusión. Conterá un resumo de todas as observacións, alegacións e informes recibidos, xustificando como foron tomados en consideración e se integraron no planeamento. Ademais, xuntarase copia dos informes recibidos, incluíndo copia daquelas alegacións que presenten temática ambiental.
- **Documento resumo** no que se describa a integración na proposta final dos aspectos ambientais, do estudo ambiental estratéxico e da súa adecuación ao documento de alcance, do resultado das consultas realizadas e da súa toma en consideración.

Santiago de Compostela, 20 de decembro de 2018

Conforme:

A xefa do Servizo de Avaliación Ambiental
de plans e programas

Margarita Segade Castro

O subdirector xeral de Avaliación Ambiental

José Manuel Tobío Boquete



RESOLUCIÓN

Tendo en conta a proposta anterior, RESOLVO formular o documento de alcance do estudo ambiental estratéxico da *Modificación puntual número 2 das Normas subsidiarias de planeamento do concello de Ceredo-Cotobade*, en cumprimento do establecido no artigo 60.4. da Lei 2/2016, do 10 de febreiro, do solo de Galicia.

O prazo máximo para a elaboración do estudo ambiental estratéxico e a realización do trámite de información pública e consultas será de quince meses dende a notificación ao Concello do documento de alcance (artigo 17.3 da Lei 21/2013, do 9 de decembro, de avaliação ambiental).

Esta resolución poñerase a disposición do público na sede electrónica desta Consellería (https://cmatv.xunta.gal/tema/c/CMAOT_Avaliacion_ambiental) e remitirase ao Concello para que elabore o estudo ambiental estratéxico e teña en conta as consideracións expostas por variables ambientais na procura dunha mellor integración ambiental da Modificación puntual. Tamén se remitirá á Dirección Xeral de Ordenación do Territorio e Urbanismo para que a publique na súa sede electrónica, conforme ao disposto no artigo 144.4 do Regulamento da Lei do solo de Galicia.

Santiago de Compostela, 20 de decembro de 2018

A directora xeral de Calidade Ambiental e Cambio Climático

Maria Cruz Ferreira Costa

